

«...ԵՄ ՌԱՌԵՐԻ ՄԵՋ ՃԱՌԱԳԵՑԻ»

(Համո Սահյանի դիմակառի ներագծեր, ծննդյան 70—ամյակի առթիվ)

ՍՈՒՐԵՆ ԱՂԱՐԱՐՅԱՆ

Հազվադեպ է պատահում, որ բանաստեղծ են հռչակվում մեկ բանաստեղծությանմբ: Այդպես եղավ Համո Սահյանի հետ, որը 1944-ին, դեռ նավաստիական համազգեստի մեջ, Բաքվից Երևան ուղարկեց ամենախստապահանջ գրողին՝ Ստեփան Զորյանին, իր «Նաիրյան դալար բարդին» բանաստեղծությունը և արժանացավ նրա տաք վերաբերմունքին: Այդ բանաստեղծության տպագրությունը ոչ միայն անցողիկ մի փաստ չէր, այլև գեղարվեստական անանցողիկ հայտնություն էր, ուստի և շարժեց գրական շրջանների բոլուն, անվերապահ հետաքրքրությունը:

Ստեփան Զորյանի նամակ-հրավերով Համո Սահյանը եկավ Երևան և նրա իսկ հարկի տակ, նրա իսկ հսկողությամբ ու խմբագրությամբ պատրաստեց բանաստեղծությունների առաջին հավաքածուն՝ «Որոտանի եղերքին» (1946) խորագրով: Մինչև այդ ժողովածուի տպագրությունը Ստեփան Զորյանը գրողների բազմամարդ ժողովում զեկուցում էր կարդացել Համո Սահյանի բանաստեղծությունների մասին, նրա մոտքը կապելով սզգային բանաստեղծական ավանդների շարունակման և հայրենասիրական ներշնչանքների անկեղծության հետ: Այդ զեկուցման տեքստը տպագրվեց տարիներ անց, «Սովետական գրականություն» ամսագրի 1974 թ. ապրիլյան համարում: Տեքստում կան ժամանակի քննությունը բռնած բնորոշումներ՝ «սոսկորաբար կարոտի երգերը թախծոտ են լինում և տխուր, Սահյանի կարոտերգերի մեջ չկա տխուր շեշտ» կամ՝ «Սահյանն ունի ոճավորումներ մեր ժողովրդական երգերի ձևով, որ ոչ թե ընդօրինակություններ են, այլ ինքնատիպ, թարմ գործեր»:

Ստ. Զորյանի ուշադրությանը Հ. Սահյանը հետագայում պատասխանեց մի նվիրումով, ուր ասվում է՝

Դուք հոր նման խիստ եք եղել
Ու հոր նման ներող,
Ձեր խորհուրդը խորն է եղել
Ու խրատը գերող:

Անպակաս եղան մամուլի արձագանքները, որոնց մեջ էր Նաիրի Զորյանի ոգեշնչված գրախոսությունը: Նշանակալից էր Ստ. Զորյանի զեկուցման հետևյալ միտքը՝ «Սահյանը դեռ գնալու ճանապարհ ունի»:

Ո՞րն էր գրական միջավայրին՝ սկսած նրա մեծերից մինչև շարքայինները, համակած ուրախության և ռեկրուկյան զաղտնիքը:

«Որոտանի եղերքին» ժողովածուն բերում էր վճիտ, անպաճույճ հայացք կյանքի՝ կեցության երևույթների հանդեպ, ժողովրդական-ֆոլկլորային բառուբան, բնական պատկեր ու բնական զգացմունք, հայրենի աշխարհի կենդանի, անխառն զգացողություններ: Այս կետերից էլ սկսվեց նրա բանաստեղծական ճանապարհը, որն առաջ բերեց նաև որոշ ընդդիմադրություններ, — իբրև թե Համո Սահյանը կյանքի բազմակողմանի հարստությունը «խցկում է Որոտանի նեղ կիրճի մեջ», իբրև թե սուրբ է տալիս ֆոլկլորակերպ պարզունակ մշտածողությանը, իբրև թե միակողմանի վերաբերմունքով հափշտակված է միայն բնության նկարչությանմբ:

Մի որոշ ժամանակ Համո Սահյանը համաձայնեց քննադատության պահանջներին ու պատվիրաններին, գրեց սակավարյուն «Թեմատիկական» տողեր, սակայն շատ շուտով, ներքին ուժեղ բնագործով, հստակացավ, թե արվեստի մեջ ինչ մեծ բան է միակողմանիությունը։ Համո Սահյանը, իհարկե, անձանոթ էր Դերենիկ Դեմիրճյանի հերթական «պարագոքսին», թե աշխարհի ընկալման բազմակողմանիության նախապայմանը միակողմանիությունն է՝ կենտրոնացումը մի նյութի, մի առանցքի վրա, սակայն նրա էություն մեջ խոսում էր ճշմարիտ բանաստեղծի ձայնը։ Այս առումով բեկումնային եղավ «Բարձունքի վրա» (1954) ժողովածուն, ուր թեև կային «Թեմատիկական լայնացման» ոչ քիչ նմուշներ, սակայն ճիշտ էր գտնված Հ. Սահյանի տաղանդին ներհատուկ բնությանագրության ուղղությունը։

«Բարձունքի վրա» ժողովածուն ուշագրավ էր նաև «փոքր հայրենիքի»՝ ծննդավայրի և «մեծ հայրենիքի»՝ ամբողջ երկրի սերտ առնչությունների դրվածքով։

Համո Սահյանը ամբողջովին, անմնացորդ սուզվեց բնության էության մեջ և նրա ստեղծագործական ճանապարհի նոր սկիզբ հանգիսացավ «Քարափների երգը» հավաքածուն (1963), ուր նա վերջնականապես և վճռականապես ազատագրվեց իր աշխարհին խորթ, եկամուտ նյութերի վերաբարձումներից և հաստատվեց իր աշխարհի դիրքերում։ «Քարափների երգը» նշանավորվեց, նսոխ և առաջ, Բնության երկրպագությանը, այսպես կոչված վիրադարձի խոստովանություններով, Մայր բնության հետ ձուլվելու ներքին կալիքով։ Այդ վերադարձն ու Կալիքը, Քարափներին ապավինելը նշանակում էր ոչ այլ ինչ, եթե... մարդու վերադարձը դեպի ինքն իրեն, մարդու էության իրարախույս բեռների միասնության որոնում։

Ռուս հայտնի գրական քննադատ Ստանիսլավ Ռասսադինը տարիներ առաջ «ИЮСТЬ» ամսագրում տպագրած իր մի հոդվածում, որը կոչվում էր «Հաղթահարում», անդրադառնալով Համո Սահյանի և Պ. Սևակի բանաստեղծական աշխարհների էությանը, առաջինի համար բնորոշ էր համարում «մարդը բնության երկվորյակն է» բանաձևը, երկրորդի համար «բնությունը մարդու երկվորյակն է» բանաձևը։ Իհարկե, էական տարբերություններ կան վերոբերյալ սահմանումների միջև (մեկի համար հավերժականը բնությունն է, մյուսի համար՝ մարդկային կյանքը) և, այդուամենայնիվ, նույն տարբերություններով իսկ, քննադատի տեսակետով, Համո Սահյանը և Պարույր Սևակը արյունակից-տոհմակիցներ են՝ իբրև բանաստեղծության ճշմարտության համբավաբերներ, իբրև աշխարհի անդաշն կերպերից նրա ներդաշնակությունը կառուցողներ, իբրև «քառսից» «հոգու կոսմոսը» ստեղծողներ։

Համո Սահյանի համար ճանապարհն անցնում է բնության միջով։ Բնության նրա մեկնաբանությունն ամենևին առնչություն չունի ոչ պանթիստական աշխարհայացքի հետ, որի համաձայն բնությունը ամսփածաշնչյան «գաղափարական ապաստարան» է, ոչ XX դարասկզբի որոշ գեղարվեստագետների (օրինակ, նորվեգացի Կնուտ Համսունի) առաջարկած «հովվերգության ապաստարանի հետ», ոչ նույն XX դարում սրբագործված «անհղծ», «անեղծ», գավառական ռոմանտիկայի արտահայտությունների հետ։ Հ. Սահյանի ներկայացրած բնությունը ամենից առաջ ինքնուրույն և մեծ, անկախ և հարուստ գոյություն է, ուր XX դարավերջի տագնապանների մեջ ընկած մարդը որոնում է... մարդուն, որոնում է իր «ներքին պատկերը»։ Զափալանց բնորոշ է հեռակալ փոխակերպությունը. եթե մինչ XIX դարի (և ավելի վաղ ժամանակների) բանաստեղծները անձնավորում էին բնությունը, բնության տարբեր երեվոյթներին հատկացնելով մարդկային դեմք ու դիմակ, ապա XX դարում կատարվում է հակադարձ երևույթը՝ բանաստեղծներին արդեն մարդուն են հատկացնում բնությանը հատուկ գծեր, բնությունից են վերաքաղում այն գույները, որոնք անհրաժեշտ են մարդու ամբողջացմանը։

Հիշենք Ավետիք Իսահակյանի սքանչելի բանաստեղծություններից մեկի հետևյալ պատվիրանը.

Մտնը իջիր երկյուղած
 Եվ այս մամուտ ժայռը մեծ
 Խոնարհ սրտով համբուրիր—
 Նա եղբայրն է քո երեց...

Իմաստության այս շառավիղով էլ Համո Սահյանը վերադառնում է դեպի իր քարափներն ու սարերը, անտառներն ու հովիտները, դեպի Գյաղաբլն ու Սալվարդը, դեպի իր «կանաչ եղբորը»՝ գտնելու այնտեղ մարդուն հիշեցնող «կուլտուրական այն շերտերը», որոնց գոյության մասին շարունակ ազդարարում էր Միխայիլ Պրիշվինը՝ ուես ականավոր բնապաշտը, բնության մեծ գիտական ու փիլիսոփան։ Բնության այս ըմբռնումը՝ «ամեն ինչ բնության մեջ ունի իր դմքը», XX դարի հայտնագործությունն է, որով և բացատրվում է նորագույն արվեստի բնության կողմնորոշումը, այն ըմբռնումը, որը բնավ աղերսներ չունի «քաղաքակրթության մայրամուտի» դարասկզբից հոլովվող իմաստասիրությունների հետ։ Մինչ մայրամուտային փիլիսոփայության տարբերակներում արտահայտվում է պատմության հոգեվարքի, անգամ ապոկալիպսիսի հոգեբանությունը, ապա դեպի բնությունը կանչող գեղագիտության այլևայլ տարբերակներում երևում են այն աղբյուրները, որոնք կոչված են հրահրելու ներդաշնակ մարդու ժամանակակից իդեալը։

Եկել եմ, որ մի անգամ էլ
 Նստեմ քեզ հետ,
 Խոսք-խոսքի տամ, խորհուրդ անեմ,—

Համո Սահյանի այս և նման տողերը ոչ այլ ինչ են, եթե... բնության գծերով իրեն ստուգող, բնությունից դաշնության ոգին վերաքաղող մարդկային անհատականության հարստացման պատգամախոսություն։ «Քարափների երգը» գրքում ուշագրավ էր նաև զարմանալի, եղբայրական-ծնողական արյունակեցության հասնող մտերմությունը բնության պես-պես դրվագների հետ։ Այդպիսի բանաստեղծությունները շատ-շատ են, մեկը մեկից ուժեղ և իմաստուն, ինչպես, օրինակ, «Քարափը».

Մանր նստել է քարափը ձորում,
 Հյուրընկալ տերը մանկության ձորի։
 Ճակատից քարե քրտինք է ժորում,
 Ուսից կախվում են մամուռ ու մորի։
 Նստել է ձորում՝ երկինքը դեմքին,
 Մանր նստել է և ամեն մեկին
 Իրենց արժանի պատիվն է տալիս.
 Վայրի աղավնուն՝ հաճարը վայրի,
 Մոլորված ամպին՝ իր քիվն է տալիս,
 Խրտնած քարաձին՝ մութն իր քարայրի։
 Հոգնած ճամփորդին պատիվ է անում,
 Ցրտին՝ տաքության հոգեպահուստով,
 Շոգին՝ ձյունահամ աղբյուրով անուշ
 Եվ իր ստվերի լայն առաքաստով։

Բնության դրվագների «անանձնական» էության սահյանական մեկնաբանությունը փոխկանչի է գնում հայոց բանաստեղծության թուամայնական-մեծարենցյան-խառնակյանական-բակունցյան ավանդույթների հետ։ Թուամայնականակա՞նը կյանքի անսահմանության և «կյանքի հրաշքի» ըմբռնումն է, մեծարենցյանը՝ անանձնական «ըլլալիներին» մարդասիրության կետը, խառնակյանականը՝ բնության բարեկամության և մտերմության շունչը, բակունցյանը՝ «բնական մարդու» վերադարձի մեծարանքի շերտը։ Եվ, այսուամենայնիվ,

Համո Սահյանի պոեզիան ինքնուրույն և ինքնատիպ արժեք է, ժանրակշիռ և իմաստուն, կրում է իր անհատականության դրոշմը:

Համո Սահյանի ուսուցիչների և նախորդների շարքում կարելի է ամելագրել նաև ուրիշ անուններ (Վահան Տերյան, Սերգեյ Նսենին, Դարսիա Լորկա և այլն): Այդ շղթայի օղակներից մեկն է նա մի շարք առումներով, հատկապես բանաստեղծական զգացմունքի անմիջականությամբ և մտքի խորությամբ, բնության մոդելների միջոցով կյանքի դրամատիկական բովանդակությունը արտահայտելու մղումներով, իր բառուբանի ժողովրդաշունչ-ֆոլկլորակերպ կողմնորոշումով:

Արդեն առաջին՝ ջահելության շրջանի բանաստեղծություններում Համո Սահյանի տողերը ճառագում էին անմիջական, հոգեկան մտքամության ու հաղորդակցության կանխող խոսքեր («Իմ թևավորես, արևավորես, դու ե՞րբ ես գալու», «Անտառում» և այլն): Իսկ իմաստության հասակում, բնավ կորցրած ստեղծական շմատներով տարբերային անմիջականությունը, Համո Սահյանի պոեզիան հակվում է դեպի «աշխարհի բանի» փիլիսոփայական սուղումները, Գոյության իմաստալից բացահայտումները՝

Խորքերում գանձ ունեն քարափները,
Թիկունքներին ունեն անտառ ու հերկ,
Միայն մի բան չունեն քարափները,
Քարափները չունեն կարապի երգ...

կամ՝

Մի շեն աշխարհ մեր աչքերում,
Ճախրում էինք՝ մեր առջևում
Կանաչ-կարմիր օրեր...
Ա՛խ, եթե կաք այն աշխարհում,
Դուք առանց ինձ ի՞նչ եք անում,
Լորահովտի լորեր:

Համո Սահյանի պոեզիայում աստիճանաբար նվազեցին հայեցողական տարրերը և, հակառակը, ուժեղացան դրամատիկական շեշտերը: Կածանի կենսագրությունը, մասրենու մենախոսությունը, քարափի ինքնասուղումը, անտառի տարերքը և այլն, և այլն, երևում են ոչ միայն բնապատկերային նկարագրությամբ, այլև կյանքային սուղումներով՝ համարժեքներով: Օրինակ, «Հողմը անտառում» բանաստեղծության մեջ Հ. Սահյանը ներկայացնում է անտառային սովորական տարրերին համապատասխանող մարդկային դրաման՝ կյանքային արեկոծությունների, շարժումների, պայթյունների մի ամբողջական տեսություն:

Եղե՛լ եք երբեք անտառում
Տեսել եք թե ինչ է կատարվում,
Երբ հողմը մտնում է անտառ:
Ճշում են հավքերը, թրփրտում
Եվ իրենց երկինք են շարտում,
Մտնում են հավքերը անտառ:
Թափվում են բները ճյուղերից,
Կախվում են ճտերը շյուղերից,
Դողում են ճտերը անթև,
Փախչում են ճտերը բներից,
Կառչում են ծառերը բներից
Մնում են ճտերը՝ անտեր...

Եվ հետո՝ հսկաներ տապալված,
Եվ բներ, և բներ խափանված,
Հավթի ճիշ... մեղվի թիռ... աշխարհ...

Աշխարհի տագնապնների նմանօրինակ անդրադարձումներով Համո Սահյանը արտահայտում է նաև սոցիալական-բարոյական հարցեր՝ ինչպես մարդու և բնության խաթարված հավասարակշռության վերանորոգման խնդիրը (որը դարձել է ժամանակակից արվեստի առանցքային խնդիրներից մեկը), ինչպես մարդու օտարացումը ինքն իրենից (մի երևույթ, որը կեցության «ուրբանիզացիայի» անմիջական հետևանքն է), ինչպես մարդկային հարաբերությունների նախաստեղծ պարզության կորուստները (որը մեր օրերում վերաճել է դրամատիկական սուր կերպարանքի)։ Այս խնդիրների պարբերական արձարծումներով Հ. Սահյանը չի դառնում հտահայաց մտածող՝ կյանքի նահապետական ձևերի իդեալականացման ուղղությամբ։ Այդպիսի վերագրումներ, իհարկե, եղել են, նրա հողային-բնապաշտական-եզերքային ներշնչանքների մեջ «դիտելով» սոսկ անմարդաբանակ ժայռերին ու անտառների ապավինած միայնակ հոգիների անհասկանալի դիմադրությունը կյանքի նորոգման ընթացքին։ Ամբողջ խնդիրն էլ այն է, որ այդ իսկ ներշնչանքներով՝ վերադարձի կանչերով, Համո Սահյանը մեծարում է բնության և հողի (սա հոմանիշն է կյանքի, առհասարակ աշխարհի) ստեղծարար, կենսունակ, զարդացման անհրաժեշտ սկիզբը, իսկ նահապետական անհետացող կեցության մեջ գնահատում է աշխատավորի՝ սերմանողի, մաճկալի, հերկվորի, հնձվորի բարոյական խիղճը։

Արձանագրերնք նաև այն պարագան, որ Հ. Սահյանին շատ հաճախ ժայցելում է՝ ն ո ս տ ա լ զ Ի ա ն՝ տխրաշունչ կարոտը իր մանկության օրերի, ծննդավայրի գույների հանդեպ, — խորապես բնական — մարդկային մի զգացմունք, որով բացվում է հիշողությունների կծիկը.

Զանգեղուրում կա մի գետ,
 Որ խոսում է ափի հետ,
 Հոսում է օրնիրուն...
 Գետի ափին այն վճիտ
 Կա անպաճուճ մի խրճիթ —
 Գեղեկական մի տուն։
 Կտուր ունի մի ծաղկած
 Եվ պատի տակ թեք ընկած
 Մի գերանացու...
 Բակում թփեր կան վարդի
 Խանութ — խաթուն մի բարդի
 Ու երեք ածու...

Սա Համո Սահյանի հայրական տունն է Որոտանի եզերքին (այստեղ Նոր գյուղում է 1914-ին ծնվել ապագա բանաստեղծը)։ Այդ տանը իրիկնահացի է նստել Խաչի պապի մեծ գերդաստանը, այստեղ է Համո Սահյանը ապրել հոգեկան առաջին դրաման՝

Տխրությունս կամաց-կամաց
 Փոխվում է լացի...

Մանկությունը մարդու կյանքի ամենալավ ժամանակն է, անգամ այն դեպքում, երբ աղքատ, անշուք, հուզախոռով է այդ մանկությունը։ Հ. Սահյանի մանկության մեջ, ինչպես երևում է իր բանաստեղծական հիշողություններից, եղել են բազմաթիվ գունավոր-նախշուն պատկերներ, սակայն դրանց բարձրակետը հետևյալ հովվերգությունն է.

Իջնում էր խոհուն, խոնարհ
 Դեզերի ուրին
 Մի կաթնահունց երկնակամար,
 Մի ծերատ լուսին...

Մեկը մեկից ամաչելով,
 Եվ զուսպ և հավաք,
 Նստում էին մերոնք կարգով—
 Կրտսեր ու ավագ:
 Նստում էին ու սպասում
 Մինչև պապը գար,
 Մինչև բակում Ծաղիկ եզան
 Զանգը ծնգար:
 Պապը գալիս, սուփրի գլխին
 Նստում էր շուքով,
 Իմ լցվում էր տունը դաշտի
 Բույր ու շշուկով...
 Ու երբ տատս ձեռքն էր առնում
 Շերեփր իր հին,
 Գդալները բնազդաբար
 Աղմկում էին...

Համո Սահյանը անմնացորդ նվիրված է իր մանկությանը, ուր ամեն ինչ պարզ ու նախնական էր, «անզաղտնիք» էր ու անխորհուրդ, ուր

Կարծես ամեն ինչ հասկանալի էր
 Ոչ մի բանի մեջ խորհուրդ չկար,

ուր ամենամեծ հրաշքը իր գլուղն էր, որը՝

Հողոտ, մղեղոտ մի մութ էր հագնում
 Հետո լուսնյակ էր հագնում մեր տունը:
 Կտուրին բարդու ստվերն էր քնում,
 Եվ շեմի վրա քնում էր շունը:
 Կիսարթուն քամին կտուրից թռչում,
 Ցանկապատին էր հենում կռնակը:
 Անթեղի վրա կատուն էր քնում,
 Իսկ անթեղի տակ հոգնած կրակը:
 Բակը փուլ գալիս և առոք-փառոք
 Որոճում էին օրհնած եզները:
 Տան կտուրի տակ արթուն էին լուկ
 Հողոտ, մղեղոտ մեր հրազները...

Հայրենական գեղջկական տունը՝ «անպաճույճ խրճիթը», իր շրջապատով, ծառ ու թփով, ամեն-ամեն ինչով, «բուրում է մանկությամբ», այդ մանկության վերհուշները՝

Ա՛խ, ինձ այնտեղ տարան,
 Հեռնաշխարհը տարան
 Այն հրկնամերձ,—

ուր նախնիները «ապրում էին, մեռնում», «աղոթք էին անում ու բախտ էին բռնում», «հույսեր էին թաղում, հոգսեր էին քաշում», «զրույց էին անում աստծու հետ սուտ», «եզան վզից ուլունք ու զանգ էին կախում»,—

Եվ ապրում են հիմա
 Ու հեքիաթ են ասում
 Իմ հուշերի հարուստ
 Տերության մեջ:

«Հուշերի տերութիւն» մեջ, ինչպես վկայում են բանաստեղծութիւնները, կան աղագորական-կենցաղային-հոգեբանական շատ մանրամասնութիւններ՝ այդ ամենի վրա դրոշմված Հ. Սահյանի անհատականութիւն կնիքը: Իսկ գրականութիւն մեջ, առհասարակ արվեստի մեջ, սեփական կնիք ունենալը շատ մեծ բան է: Դա ինքնութիւն ամենաստույգ վկայութիւնն է: Հ. Սահյանի ինքնութիւն կնիքը երևում է ոչ միայն աշխարհազգացական կոորդինատներում, որը չափազանց հարուստ շերտեր է պարունակում, այլև բանաստեղծութիւնների կառուցվածքում, արտահայտման լեզվի՝ ձեռագրի մեջ: Թեև ժամանակակից բանաստեղծների մեջ Հ. Սահյանը համարվում է ավանդական, անգամ՝ «պահպանողական», բայց իրականում նա բանաստեղծութիւն կառուցվածքների և ձևերի նորարար է՝ այս հասկացութիւն ամենաբարձր նշանակութիւն: Հայոց բազմադարյան բանաստեղծութիւն պատմութիւն մեջ (և ոչ միայն հայոց) դժվար է մատնացուցց անել որևէ մեկին՝ հայտաբերելու համեմատութիւն եզրեր: Օրինակ, ո՞ր բանաստեղծութիւն հետ համեմատես սահյանական տողերի այս կառուցվածքը՝

Կաթակ էր, խփեց, բեկվեց, թփրտաց,—
 Ու մեկը մեռավ լեռան կատարին,—
 Երանի՜ նրան,—

Կամ այս մեկը՝

Իջավ սարյակը դաշտում—ծիւ էր կտուցին,—
 Շուրթի վրա մի կանաչ տող էր թպրտում,—

Կամ այս մյուսը՝

Ժայռից մասուր է կաթում,
 Կարմիր սարսուռ է կաթում,
 Ձորում մշուշ է:

Համո Սահյանի բանաստեղծական աշխարհի էպիկենտրոնը «բառաշաղախն է», ինչպես շատ ճիշտ նկատել է բանաստեղծուհի Մարո Մարգարյանը 1974-ին «Հայրենիքի ձայն» թերթում տպագրած հոդվածում: Իրապես, հազարամյա-հազարամյա բառերի նոր դասավորութիւն, դրանց նոր համաձայնութիւնների ու հնչերանգային փոփոխութիւնների, բառազանձարանի տոհմական-աղգային շնչի հայտաբերման մեջ է Հ. Սահյանի ճանապարհը, որը առաջին տպավորութիւնը թեև չի թողնում դժվարանցի (ավելին՝ թողնում է դյուրամատչելիութիւն) տպավորութիւն, սակայն իրականութեան մեջ ստեղծագործական ճախրանքների, մաքառման ու հոգևոր լարման ճանապարհ է: Ուշագիշտ ընթերցումը վկայում է, որ Համո Սահյանի բանաստեղծութիւնների արտահայտման ձեռագիրը ավելի ու ավելի մերձենում է սովորական զրուցի, առօրյա խոսակցութեան, գեղջկական պատումների ոճին, բանաստեղծութիւնը ազատագրվում է «բանաստեղծականութիւնից» (այս հասկացութիւն այն նմուշների իմաստով, որոնց Պ. Սեակը անվանում էր «գանգրահեր բառերի վաճառականութիւն»), անգամ երգային (ռոմանսային) հատկութիւններից՝ ներարկելու կյանքի կենդանի շունչը, լիարժեք բովանդակութիւնը, երևույթի էությունը: Իր բառային ինքնատիպ համաձայնութիւններով, բառերի կարգ ու սարքի իր համակարգով Հ. Սահյանը «սովորականացնում-հասարակացնում է» բանաստեղծութիւնը (ինչպես իր մեծ ուսուցիչը՝ Հովհ. Թումանյանը), ասել է թե ճանապարհ է տալիս այն աղբյուրներին, որոնք զարդանախշերի փոխարեն բերում են արտաքին աշխարհի գույների ու ձևերի ամբողջութիւնը: Գեղարվեստական այդ խնդիրը՝ արտահայտման ձեռագրի սովորականացումը որքան հեշտ թվացող, նույնքան էլ դժվարին լուծվող առաջադրութիւն է, որը կարող են լուծել միայն բացարձակ տաղանդի, բնազդի ու ճաշակի տեր արվեստագետները: Այդպիսին է Համո Սահյանը: Հ. Սահյանը բանաստեղծու-

թյունը «հասարակացում է» ոչ թե բառային անկազմակերպ խաժամուժի միջոցով, այլ բանահյուսական կնիքի բառային-խոսքային կառուցվածքների, ժողովրդական լեզվագանձների, զրույցների, դիալոգների, մեներգների, զուգերգների, սաքների շտեմարանների օգտագործման ճանապարհով: Նման կողմնորոշման դեպքում միանգամայն հասկանալի են դառնում Հ. Սահյանի բանաստեղծությունների ներքին էներգիայի հզորությունը, զգացմունքների հասունությունը և մտածմունքների իմաստությունը, հարուստ հոգեկան տարերքը:

Հ. Սահյանի բառերը ոգու էություն կրողներն են: Իհարկե ոչ թե այդ բառերի բառարանային գրանցումների տեսքով, այլ հոգեկան աշխարհի խառնարանով անցած բառային միացություններն ու համաձայնությունները: Բանաստեղծի բառային միացությունների մեջ ամենաաչքի ընկնող հատկանիշը դրանց դարմանալի բնականությունն է: Ընթերցողը բնավ չի զգում այդ միացությունների կերպը, այսպես կոչված «արհեստը»: Բառի կողքին հայտնվում է մի նոր, սովորական բառ, պատկերի կողքին՝ մի նոր, սովորական (կամ անսովոր) պատկեր, իսկ հուզապրումը այդ կապերի բարդ շղթայում ձեռք է բերում արտահայտման ներքին ձևը, այսպես կոչված կառուցվածքը: Ահա այս ճանապարհով Հ. Սահյանը լուծում է ձևականության ճգնաժամային նոր խնդիրներ, շեշտը, կրկնում եմ, գցելով ոչ թե արտաքին կողմի վրա, այլ ասելիքի խորության, ազնվության, բնականության, ճշմարտության:

Թեև հայ և ռուս քննադատները, դառնալով Հ. Սահյանի քնարերգությանը, նրա գեղարվեստական աշխարհին, առանձին ուշագրավ դիտողություններ են արել արտահայտչության մասնավոր կողմերի վերաբերյալ, սակայն նրա պոետիկական արվեստի ամբողջական և մանրակրիտ հետազոտությունը գրականագիտության օրակարգի չլուծված խնդիրներից մեկն է: Գիտական խոր բացահայտման կարիք ունեն թե՛ ժողովրդախոսակցական լեզվի հարուստ շտեմարանից օգտվելու սահյանական չափազանց ինքնատիպ եղանակները (որ չի կարելի ամենեկին շփոթել ազգագրական-բարբառային ռեպերտուարների հետ), թե՛ պատկերի կառուցման սահյանական «անակնկալները», թե՛ բառային ձևերի միանգամայն ինքնուրույն համաձայնությունները, թե՛ բանաստեղծական ուղիքի, հանգի բնարուխ զգացողությունները, թե՛ ցածր, սովորական և բարձր, հանդիսավոր ոճային-բառային շերտերի զուգակցությունները և այլն, և այլն:

Հ. Սահյանի մասին ասված խոսքերից թերևս ամենապատշաճը «Իմաստուն» բնորոշումն է,— ոչ թե հանրագիտակ, այլ ժողովրդական արմատներից վեր բարձրացած, ժողովրդյան ճակատագրով ներշնչված իմաստուն-բանաստեղծ, որի քնարերգության էջերը լեզի-լեցուն են կեցության բարդ շերտերի սուղումներով, հարցերով և պատասխաններով, թևավոր բառ ու բանով: Հիշենք դրանցից մի քանիսը:

Կենաց արմատների մեծարանքը՝

Եվ դառնամ դարձյալ հավքին աղոթեմ,
Աղոթեմ ծաղկին, հասկին աղոթեմ,—
Աղոթեմ խոտին:

Եվ դառնամ դարձյալ հողին աղոթեմ,
Արդար քրտինքի ցողին աղոթեմ,
Աղոթեմ խոտին:

Եվ դառնամ դարձյալ խոսքին աղոթեմ,
Ոչ թե անցավոր ցուլին աղոթեմ,
Աղոթեմ խորքին...

Ամեն օր բացվող լույսին աղոթեմ
Ու լույսի հոտին...

Հայոց լեզվի իմաստավորումը՝

Նա պիտի մեր առաջին
 Ու վերջին սերը լինի,
 Ի՞նչ ունենք էլ աշխարհում
 Որ այսքան մերը լինի:

Համո Սահյանն ունի բանաստեղծական ինքնաբերականություններ, որոնցից մեկը հետևյալն է՝ «Աստղի նման ես բառերի մեջ ճառագեցի»: Նրա Բառերն, իրապես, արտացոլում են իր հարուստ, 70-ամյա ճանապարհը, իր արմատն ու իր ճակատագիրը:

Հ. Սահյանն ունի տողերիս հեղինակին ձոնած մի բանաստեղծություն՝ «Թե ով եմ և ինչ» հարցումնային վերնագրով:

Եվ քո աչքերը հարցնում են դարձյալ
 Թե ով եմ և ինչ,
 Եվ իմ ճանապարհն ուր է վերջանում...

Հետևում են հարցի պատասխանները, թե ինքը ծառի տերևի «առեղծվածային ջանքն է», թևավոր հավքի ներշնչանքն է, ծառավ հողին ջուր տանող գետի տառապանքն է, արտերի հասկավորման խորհուրդն է, նախնազարից մեր օրերը հասած քարանձավի հառաչանքն է, — այս ամենից հետո, — գրում է բանաստեղծը, —

Աչքն ու ականջն եմ ես մայր բնության,
 Գիտակցությունը նրա մարմնավոր,
 Հասակակիցն եմ նրա հնության
 Եվ ծլարձակումն ու ծաղկումը նոր:

Սա է Համո Սահյանի ճանապարհը: